

# DOMENIE ULIVE

## «DE PASSIONE DOMINI»

### Jutoris pe Liturgjie

Domenie, ai 25 di Març dal 2018

*I nestrîs paîs a àn simpri sintût e vivût cun grant rispîet la Domenie ulive e l'inizi de Setemane sante. E je une domenie dute speciâl li che la benedizion dal ulîf, la procession, i cjants, l'aiar fresc ti dan cuasi un sens di primevere, di vite, e li che i paraments colôr dal sanc e lis leturis de messe nus puartin a pinsîrs di marum e di muart.*

*La antifone di jentrade e conte alc dal ingrès di Gjesù a Gjerusalem, ma podin ancje domandâsi: ce pinsîrs passavino tal cûr di Gjesù, intant che, seont il vanzeli di Marc, i menarin il mussut, a slargjarin parsore lis lôr mantelinis e Gjesù si sentà parsore.*

*Un ingrès in regule cu lis profeziis, chel di Gjesù, ma ancje tant strani; in chê fole e veve di sedi int di ogni raze, dai siei fedêi, dissepui e feminis, ai puars, ai devots, ai sbandâts, ai nazionaliscj politics, a int prone a doprâ la spade cuntri dai Romans, ai spions dal templi, ai nemîs che a cjalavin e a masanavin inicuitâts intant che a spietavin il moment propizi di fâlu fûr, a int che a sperave in lui par un ream di Diu, par une societât gnove plui juste e umane li che si podeve finalmentri tirâ flât.*

*Alc di dut; e in dut chest, Gjesù al ven presentât dal profete Zacarie come om di pâs, elezût par puartâ la pâs. Ve il to re al ven li di te... al è montât suntun mus... L'arc di vuere al vignarà crevât e ur contarà la pâs ai forescj (Za 9, 9-10).*

*Ducj si spietave alc di Gjesù, ma dome Gjesù al saveve te realtât ce che lu spietave. I apuestui a vevin pôre e a speravin, forsît lis feminis a capivin di plui e la Madone, se e jere presinte, a varà olmât plui di ducj la tragedie intant che in cûr i diventave simpri plui clare la profezie dal vecjio Simeon: une spade e passarà la tô anime fûr par fûr (Lc 2, 35).*

*Come la fole di chei tîmps, o vin di compagnâ ancje nô Gjesù cui nestrîs paîs e glesiis, cu la nestre vite, cu lis burascjiis dal mont di vuê, cun chel desideri di pâs che e je te anime di ducj e che dome lui al pues colmâ, lui che al è la nestre pâs... anulant te sô cjâr la inimicissie... midiant de crôs... (cfr. Ef 2, 14-18).*

*Al è ce che la liturgjie de messe vuê nus palese.*

**Antifone di jentrade**

**cf. Zn 12,1.12-13;**

**Sal 23,9-10**

**S**îs dîs prime de grande Pasche, cuant che il Signôr al jentrà te citât di Gjerusalem, i fruts i lerin incuintri: tes mans a puartavin ramaçs di palme e a berlavin a grande vôs disint:

Osana tal plui alt dai cîi. Benedet tu che tu sês vignût te bondance de tô misericordie.

Alçait, puartis, lis vuestris antis,

alçaitsi, puartis eternis,

par ch'al jentri il re de glorie.

Po cui esal il re de glorie?

Il Signôr des schiriis, al è lui il re de glorie.

Osana tal plui alt dai cîi. Benedet tu che tu sês vignût te bondance de tô misericordie.

**Colete**

Diu onipotent e eterni,

che par dâi un esempli di umiltât a la gjernazie umane

tu âs fat cjapâ sù al nestri Salvadôr la nestre cjar

e patî la muart in crôs,

danus la gracie di vê denant dai vôi il spîeli dai siei patiments

e di mertâ di spartî la sô resurezion.

Lui ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

## PRIME LETURE dal Signôr)

Is 50,4-7 (Tierç cjant dal Servidôr

No ai platade la mê muse ai patafs e a lis spudadis, savint che no sarai malapaiât.

*La lezion e dîs: une lenghe par tignî sù chel che al è strac... la orêle par che o scolti... no mi soi tirât indaûr... la schene... la barbe... la muse ... patafs e spudadis... tant che une pierre...*

*Isaie, il servidôr di Diu, il dissepul, il just di vuê, il perseguitât pe justizie a scoltin la peraule di Diu e a acetin lis consequencis, parcè che ancje Gjesù, il mestri, al à imparât, patint, a ubidî a chê vôs (Eb 5, 7-10).*

### Dal libri dal profete Isaie

Il Signôr Diu mi à dade une lenghe di dissepul,  
par ch'o sepi tignî sù chel ch'al è strac  
cu la peraule.

Lui al vierç la mê orele  
par ch'o scolti, come ch'a fasin i dissepui.

Il Signôr Diu mi à vierzude la orele  
e jo no soi stât cjaviestri,  
no mi soi tirât indaûr.

O ai presentade la mê schene a di chei che mi pestavin,  
la mê muse a di chei che mi gjavavin la barbe.

No ai platade la mê muse  
ai patafs e a lis spudadis.

Il Signôr Diu mi à dât jutori,  
par chel no soi malapaiât;  
par chel o ai fate diventâ la mê muse tant che une pierre  
e o sai che no sarai malapaiât.  
Peraule di Diu.

## SALM RESPONSORIÂL dal Salm 21

*Te liturgjie di vuê nol pues mancjâ almancul un struc dal salm 22; chest salm che Gjesù al à preât fra i patiments cence fin de crôs, chel salm che i disperâts de tiere a tornin a preâ vuê, forzit cun peraulis diferentis, ma cul stes lament e fede.*

*Unìn lis lôr invocazions a chês di Crist e uninsi ancje nô a la lôr vôs disint:*

### **R. Diu gno, Diu gno, parcè mo mi âstu bandonât?**

*Se cjantât: Il cjant dai salms responsoriâi, p. 112.*

A tachin a sghignî ducj chei che mi viodin,  
a menin il cjâf e a stuarzin la bocje:  
«Si è metût tes mans dal Signôr, che lu liberi;  
se propit i vûl ben che lu salvi lui». **R.**

Un trop di cjanats mi dan la strente,  
un trop di intate mi contorne.  
A an sgjavât lis mêns mans e i miei pîts,  
ducj i miei vues o pues contâju. **R.**

Si spartissin fra di lôr la mê munture,  
i miei vistîts sai tirin a bruscjete.  
Ma tu, Signôr, no sta lâmi di bande,  
tu, la mê fuarce, spessee a judâmi. **R.**

O contarai il to non framieç dai fradis,  
ti laudarai in plene semblee.  
Vualtris, ch'ò temês il Signôr, laudaitlu,  
gjernazie di Jacop, dait glorie a lui,  
ducj vualtris, dissendence di Israel, onoraitlu. **R.**

## SECONDE LETURE

### Fil 2,6-11

**Crist si è sbassât e ridusût a nuie, par chel Diu lu à quartât in alt.**

*Cheste, che Pauli nus à tramandât, e je une perle fra lis cjantis des primis comunitâts cristianis.  
Sintinle, par tornâle a scoltâ e scoltantle, cirin di tornâle di gnûf, tal nestri cûr, a sintî.*

*Tignint adaments la raccomandazion dal Apuestul: Cirî di sintî dentri di vualtris ce che al à di sintî  
chel che al è in Crist Gjesù (cfr. Fi 2, 1-5). Duncje, ce vino di sintî? Cemût vino di cirî di vivi?*

### **De letare di san Pauli apuestul ai Filipês**

Crist Gjesù, jessint Diu par nature,  
nol à ritignût un ben di no molâlu  
il so jessi compagn di Diu,  
ma si è ridusût a nuie  
cjapant sù la nature di sotan  
e diventant compagn dai oms;  
comparît in forme di om,  
si è sbassât inmò di plui  
fasintsi ubidient fint a la muart  
e a la muart di crôs.  
Par chel Diu lu à quartât in alt  
e i à dât chel non  
ch'al è plui alt di ogni altri non,  
par che tal non di Gjesù  
si plei ogni zenoli  
des creaturis dai cîi, de tiere e di sot tiere  
e ogni lenghe e professi  
che Gjesù Crist al è il Signôr,  
a glorie di Diu Pari.  
Peraule di Diu.

### **CJANT AL VANZELI Fil 2,8-9**

#### **R. Glorie e laut a ti, o Crist!**

Par nô Crist si è fat ubidient fint a la muart,  
e a la muart di crôs.

Par chel Diu lu à quartât in alt  
e i à dât chel non ch'al è plui alt di ogni altri non.

#### **R. Glorie e laut a ti, o Crist!**

## La passion dal Signôr.

*Nol è motif di scugnî meditâ dute interie la passion di nestri Signôr. Certis voltis par vê brame di cuantitât si piert te cualitât. Forzit al è mior lâ indevant toc dopo toc e fermâsi cence premure a polsâ sore.*

*Meditant la passion, metìn dongje de muse dal Signôr lis musis tribuladis di personis che o cognossin: lis presentarin miôr al Signôr e la passion dal Signor nus judarà a volêur plui ben.*

*Impensinsi che la conte di Marc e je, tai vanzei, la plui gjenuine, parcè che la plui dongje ai avveniments e la plui atente a la umanitât di Gjesù. In chest sens e devente ancje la plui dongje a la nestre vite che e je come che e je.*

*E ricuardin lis personis tribuladis e santis dai nestris paîs; lôr, cence scjas, tal scuindon, a àn vivude la passion di Crist.*

*I lôr nons a son scrits tai cîi (Lc 10, 20).*

**Passion di nestri Signôr Gjesù Crist seont Marc**

Doi dîs dopo si veve di fâ la fieste de Pasche e dal Pan cence levan, e i sorestants dai predis a cirivin il sisteme di cjapâ Gjesù cul ingjan e di fâlu murî. Di fat a disevin: «No intant des fiestis, par no ch'è capiti une rivolte dal popul».

Intant, cjatantsi lui a Betanie in cjase di Simon il levrôs, biel ch'al jere sentât a taule, e rivà une femine cuntun vâs di albastri plen di profum di nart rût, une vore cjâr. Alore jê, rot il vâs, lu strucjà sul cjâf di lui. Cualchidun però si jere stiçât e al diseve: «Parcè dute cheste strassarie di profum? Di fat si podeve vendilu a tresinte e passe denârs e dâ i bêçs ai puars». E a tacarin a cridâi. Alore Gjesù ur disè: «Lassaitle stâ! Parcè le lambicaiso? E à fate un'opare buine viers di me. Di fat i puars ju varês simpri cun vualtris e o podês fâur dal ben cuant ch'ò volês, ma me no mi varês simpri. Ce che e podeve fâ, jê lu à fat, onzint il gno cuarp prin da l'ore pe sepulture. Us al dîs in veretât: Par dut il mont là che si predicjarà chest vanzeli, si contarà ancje ce che e à fat jê, par ricuardâle».

Alore Gjude Iscariot, ch'al jere un dai Dodis, si presentà dai sorestants dai predis par metilu tes lôr mans; lôr, sintint une tâl, si indalegrarin e i imprometerin di dâi bêçs. E cussì lui al cirive il sisteme di consegnâural tal moment bon.

Te di dal Pan cence levan, te ore che si sacrificave l'agnel di Pasche, i siei dissepui i disin: «Dulà vuelistu ch'ò lin a preparâ par che tu puedis mangjâ la Pasche?». Alore lui al mande doi dai siei dissepui disint: «Lait in citât. Us vignarà indenant un om ch'al puarte une anfore di aghe. Lait daûrji e, là ch'al jentre, i disês al paron di cjase: Il Mestri ti mande a dî: Dulà ese la sale là ch'ò pues mangjâ la Pasche insieme cui miei dissepui? Lui alore us mostrarà une grande stanzie tal plan adalt, za furnide e pronte. Li o preparais par nô». I dissepui alore a lerin e, rivâts in citât, a cjatarin dut come che ur veve dit e a prepararin la Pasche.

Sore sere al rivà ancje lui cui Dodis e, biel ch'a jerin a taule e a mangjavin, Gjesù ur disè: «Us al dîs in veretât che un di vualtris, chel ch'al mangje cun me, mi tradissarà». Alore lôr a scomençarin a avilîsi e a dîi un par un: «Soio forsit jo?». Ma lui ur rispuindè: «Al è un dai Dodis, ch'al tocje cun me tal plat. Sì, il Fi dal om si 'nt va, come ch'al è stât scrit di lui. Però puar mai chel om che il Fi dal om al ven tradît di lui! Al sarès miei par lui che chel om nol fos nancje mai nassût!».

Intant che a jerin ancjemò daûr a mangjâ, lui al cjapà sù un toc di pan, lu benedì, lu crevâ e ur al de disint: «Cjapait! Chest al è il gno cuarp». Po al cjapà un cjaliç, lu benedì, ur al de e int beverin ducj. E ur disè: «Chest al è il gno sanc de aleance, ch'al ven spandût par une vore di lôr. Us al dîs in veretât che no bevarai plui dal struc de vît fint in chê di che lu bevarai gnûf tal ream di Diu».

Po, fate la cjante di laude, a saltarin fûr viers de mont Ulive. Alore Gjesù ur disè: «Ducj vualtris si scandalizarês, parcè che al è scrit:

“O bastonarai il pastôr  
e lis pioris si dispierdaran”.

Ma dopo ch'ò sarai resurî, o larai denant di vualtris in Galilee». Pieri però i disè: «Ancje se ducj si scandalizaran, jo no!». I dîs Gjesù: «Tal dîs in veretât che vuê, propit usgnot, prin che il gjal al cjanti dôs voltis, tu tu mi rinearâs trê voltis». Ma lui al contindeve cun plui fuarce: «Ancje s'ò ves di murî cun te, no ti rinearai par mai». E ancje chei altris a disevin ducj compagn.

Intant a rivin tun puest che i disin Gjetsemani. Ur dîs ai siei dissepui: «Sentaitsi culi, intant che jo o prei». Po al cjolè cun sè Pieri, Jacum e Zuan e al scomençà a sgrisolâsi e a spaventâsi. Alore ur disè: «La mê anime e je avilide a muart. Restait chi e veglait». Po al lè un toc plui indenant, si butà par tiere e al preave che, s'al fos pussibil, chê ore si slontanàs di lui. Al diseve: «Abbà, Pari! Par te dut al è pussibil. Slontane di me chest cjaliç! Però no ce ch'ò vuei jo, ma ce che tu vuelis tu». Al torne indaûr e ju cjate ch'a duarmin. Alore i dîs a Simon Pieri: «Simon, duarmistu? No âstu vude la fuarce di veglâ propit nancje un'ore? Veglait e preait, par no jentrâ te tentazion. Sigûr, il spirt al è pront; la cjar però e je flape». Si slontanà un'altre volte e al preà disint lis stessis peraulis. Po al tornà di gnûf e ju cjatà indurmidîts. Di fat i lôr vôi ur colavin e no savevin ce rispuindii. Al torne pe tierce volte e ur dîs: «Durmîso inmò e polsaiso? Vonde! E je rivade l'ore e ve che il Fi dal om al è consegnât tes mans dai pecjadôrs. Jevait sù e anin! Ve: chel che mi tradis al è dongje».

In chel moment, intant che lui al stave ancjemò fevelant, al rive Gjude, ch'al jere un dai Dodis, e cun lui une grande sdrume di int cun spadis e bastons, mandade dai sorestants dai predis, dai scrituriscj e dai anzians. Intant il traditôr ur veve dât un segnâl disint: «Chel che o bussarai, al è lui: Brincaitlu e menaitlu vie ben vuardeât». Nancje rivât, i lè subit dongje e i disè: «Mestri!», e intant nol finive di bussâlu. Alore lôr i meterin lis mans intor e lu cjararin. Però un di chei ch'a jerin li al tirà fûr la spade, i molà un colp al famei dal sorestant dai predis e i cjonçà une orele. Alore Gjesù al cjapà la peraule e ur disè: «O sês vignûts a cjapâmi cun spadis e bastons, come un brigant. O jeri ogni dì framieç di vualtris, cuant che o insegnavi tal templi, e no mi vês mai cjapât. Ma a an di colmâsi lis Scrituris». Alore ducj lu bandonarin e a scjamparin. Però i leve daûr un fantaçut, invuluçât dome tun bleon sul cuarp crot. A lerin par brincâlu ma lui, molât il bleon, al scjampà crot.

Alore a menarin Gjesù denant dal prin predi e si derin dongje ducj i sorestants dai predis, i anzians e i scrituriscj. Intant Pieri, che i jere lât daûr di lontan fin dentri dal curtîl dal prin predi, si jere sentât cui servidôrs di lui e si sclipive dongje dal fûc. I sorestants dai predis e dut il sinedri a cirivin cualchi testimoniance cuintri di Gjesù par fâlu murî, ma no 'nt cjatavin gran. Di fat une vore di lôr a testimoneevin il fals cuintri di lui, ma no jerin d'acuardi su lis testimoniances. Alore a jevarin su un pôcs che, testimoneevant il fals cuintri di lui, a disevin: «Lu vin sintût ch'al diseve: O butarai jù chest templi, fat des mans dal om, e in trê dîs int fasarai sù un altri, no fat des mans dal om». Ma nancje sun chest pont la testimoniance no jere compate. Alore il prin predi, jevant in pîts tal mieç dal sinedri, al interpelâ Gjesù disint: «No rispuindistu nuie? Ce vano testimoneevant cuintri di te?».

Lui però al taseve e nol rispuindeve nuie. Alore il prin predi al tornà a interpelâlu disint: «Sêstu tu il Crist, il Fi dal Benedet?». I rispuindè Gjesù: «Sì, o soi jo!

E o viodarês il Fi dal om  
sentât a la gjestre de Potence,  
a vignî sui nûi dal cîl».

Alore il prin predi, sbregantsi lis viestis, al disè: «Ce nus coventino ancjemò testimonis? O vês sintude la blesteme. Ce us parial?». E lôr, ducj, a judicarin ch'al mertave la muart. Cualchidun al tacà ancje a spudâi intor, a taponâi la muse e a patafâlu disint: «Induvine!». E i fameis a tacarin a scufiotâlu.

Intant che Pieri al jere sentât tal curtîl, e rivà une des siervis dal prin predi e, viodint Pieri che si sclipive, lu cjalà ben e i disè: «Ancje tu tu jeris cul Nazaren, Gjesù». Ma lui al dineà disint: «No sai e no capis ce che tu disis». Alore al jessì fûr tal curtîl e un gjal al cjantà. La sierve, tornantlu a viodi, e tacà a dîr a di chei ch'a jerin li: «Chel li al è un di lôr». Ma lui al tornà a dineâ. Subit dopo, chei ch'a jerin li i tornarin a dî a Pieri: «Tu sês propit un di lôr. Di fat tu sês un galileo». Ma lui al scomençà a bramâ e a zurâ: «No cognòs chel om ch'ò fevelais e vonde!». E in chel, pe seconde volte, il gjal al cjantà. Alore Pieri si visà des peraulis che Gjesù i veve ditis: «Prin che il gjal al cjanti dôs voltis, tu tu mi rinearâs trê voltis». E al sclopà a vaî.

Sul cricâ dal di, i sorestants dai predis cui anzians, i scrituriscj e dut il sinedri a faserin consei e, fat leâ Gjesù, lu menarin e jal consegnarin a Pilât. Alore Pilât lu interpelâ: «Sêstu tu il re dai gjudeos?». I rispuindè: «Tu lu disis ancje tu». I sorestants dai predis lu incolpavin di tantis robis. Alore Pilât lu interpelâ un'altre volte disint: «No rispuindistu nuie? No viodistu di tropis robis che ti incolpin?». Ma Gjesù nol rispuindè plui nuie; che di fat Pilât al restà une vore.

Lui al veve l'usance, in ogni fieste grande, di molâ un presonîr, chel che i domandavin lôr. In chê volte and jere un che i disevin Barabe, ch'al jere stât metût dentri insieme cun ribei che, intant di une rivolte, a vevin copât un. Sigheduncje la fole e lè sù e e tacà a pratindi ce che e jere usance di dâi. Alore Pilât ur rispuindè disint: «Volêso che us liberi il re dai gjudeos?». Al saveve mo che i sorestants dai predis jal vevin metût tes mans par tristerie. Ma i sorestants dai predis a uçarin la fole par che ur molàs invezit Barabe. Alore Pilât, tornant a cjapâ la peraule, ur domandâ: «Ce volêso alore ch'o fasi di chel che vualtris i disês il re dai gjudeos?». E lôr a berghelearin di gnûf: «Metilu in crôs!». Ma Pilât ur disè: «Po ce aial fat di mâl?». Ma chei a berghelearin in mò plui fuart: «Metilu in crôs!». E cussì Pilât, volint contentâ la fole, ur molâ Barabe e ur consegnâ Gjesù, par che lu metessin in crôs dopo di vêlu fat flagjelâ.

Alore i soldâts lu menarin dentri tal curtîl, ven a stâi tal pretori; e, fate vignî dute la companie, lu riviestirin di purpure e i meterin sul cjâf une corone di spinis. Po a scomençarin a saludâlu: «Salve, re dai gjudeos!», intant che cuntune cjane i davin colps jù pal cjâf, i spudavin intor e a pleavin i zenô e si inzenoglavin denant di lui. Cussì, dopo di vêlu svilanât, lu dispuearin de purpure e i tornarin a meti lis sôs viestis.

Biel che lu menavin fûr par metilu in crôs, a oblearin un ch'al passave par li tornant dai cjamps, Simon di Cirene, pari di Alessandri e di Rufo, a puartâ la crôs di lui. Lu menarin cussì tal lûc che i disin Golgote, ch'al sarès il lûc de Crepe. A volevin ancje dâi di bevi vin aromatizât cu la mire, ma lui nol volè savênt. Alore lu meterin in crôs e si spartirin lis sôs viestis, tirant a bruscjete par savê ce che i tocjave a ognidun. A jerin lis nûf di buinore cuant che lu meterin in crôs, e l'iscrizion cu la colpe de sô condane e veve cheste scrite: Il re dai gjudeos. Insieme cun lui a meterin in crôs ancje doi ladrons, un a la sô gjestre e un a la sô çampe e si colmâ la Scriture ch'e dîs: «Al è stât metût insieme cui delincueants». Chei ch'a passavin lu svilanavin scjassant il cjâf e disint: «Ei, tu che tu butis jù il templi e in trê dîs tu tornis a fâlu sù, salviti te mo, dismantant de crôs». Ancje i sorestants dai predis cui scrituriscj, sghignint fra di lôr, a disevin: «Al à salvâts chei altris e cumò nol è bon di salvâsi sè. Il Crist, il re di Israel, ch'al dismanta de crôs, par ch'o viodin e o crodin». Parfin chei ch'a jerin stâts metûts in crôs cun lui lu svilanavin.

Tor misdi al diventâ scûr sun dute la tiere, fint a lis trê dopomisdi. Tor trê, Gjesù al berlâ a grande vôs: «Eloî, Eloî, lamà sabactani», ch'al vûl dî: «Diu gno, Diu gno, parcè mo mi âstu bandonât?». Alore un pôcs di chei ch'a jerin li, sintintlu, a disevin: «Ve, al clame Elie». Però un al corè a imbombâ une spugne tal asêt, le metè suntune cjane e al ciri di fâlu bevi disint: «Lassait, viodin s'al ven Elie a dispicjâlu». Ma Gjesù, dât un grant berli, al spirâ.

**Chi si inzenoglisi e si fâs une piçule polse.**

Alore il vèl dal templi si smiezâ d'insomp fin dapît. E il centurion ch'al jere in face di lui, viodintlu a spirâ cun chel berli, al disè: «Chest om al jere propit Fi di Diu!».

A jerin ancje feminis, ch'a cjalavin di lontan. Fra di lôr Marie di Magdale, Marie la mari di Jacum il minôr e di Josef, e Salome, che i jerin ladis daûr e lu vevin servît cuant che al jere in Galilee. E cussì ancje une vore di altris, ch'a jerin ladis sù cun lui a Gjerusalem.

Rivade aromai la sere, stant che e jere la Parasseve, ven a stâi la di prin de sabide, Josef di Arimatee, om impuartant dal consei, ch'al spietave ancje lui il ream di Diu, al rivâ, si fasè il cûr fuart, al jentrâ di Pilât e i domandâ il cuarp di Gjesù. Pilât si maraveà ch'al fos za muart. Alore, clamât il centurion, i domandâ s'al jere muart di un pieç. Informât dal centurion, i de il cuarp a Josef, ch'al comprâ un linzûl di fil, al fasè tirâ jù Gjesù, lu invuluçà cul linzûl di fil e lu metè intun sepulcri ch'al jere stât picât tal cret. Po al fasè rodolâ une pierre su la parte dal sepulcri, biel che Marie di Magdale e Marie di Josef a stavin a cjâlâ dulà che lu metevin.

Peraule dal Signôr.

Si dîs O crôt e si fâs la preiere universâl.

### Su lis ufiertis

Pe Passion dal to Unigjenit,  
spessee, Signôr, a fâ pâs cun nô  
e se no le mertin pes nestrîs oparis,  
che nus e fasi vê la tô misericordie  
in grazie di cheste ufierte straordenarie.  
Par Crist nestri Signôr.

### Antifone a la comunion

26,42

Pari gno,  
se chest cjaliç nol pues slontanâsi  
cence che lu bevi,  
ch'e sedi fate la tô volontât.

Mt

### Daspò de comunion

Sostentâts di chest sant regâl, ti prein, Signôr,  
che, daspò di vênus fats sperâ cu la muart di to Fi in ce ch'ò crodin,  
cu la sô resurezion tu nus fasis rivâ là ch'ò bramìn.  
Par Crist nestri Signôr.

### Preiere sul popul

Cjale cheste tô famee, Signôr,  
che il nestri Signôr Gjesù Crist nol à esitât par jê  
a consegnâsi tes mans dai triscj  
e a frontâ la torture de crôs.  
Lui ch'al vîf e al regne tai secui dai secui.

\* \* \*

### Riflession di pre Antoni Beline: A berlavin: Osanà

Cu la cuaresime, che e à il so colm te setemane sante, ancje la vite di Crist, che le ricuardin tal misteri, e rive cun vuê al colm, cuant che Crist, midiant de sô muart su la crôs, al à vinçude la nestre muart e midiant de sô resurezion nus à garantide la jentrade te Vite. Cun vuê la glesie e ricuarde la sô jentrade te citât che al sarâ crucifizût e sapulît e che e viodarâ, restant indiferent, la sô vitorie cosmiche.

I protos a stavin masanant di un pieç...

*Vanseli par un popul,*

*an B, p.57.*

\* \* \*

### Ciants di Domenie ulive

- Osana, osana, n. 143;
- Sîs dîs prin di Pasche, n. 144;
- I fruts dai Ebreus, n. 145;
- Laut, onôr e glorie, n. 146;

- Christus vincit, *n. 147.*

**Salm 21: Diu gno, Diu gno**, parcè mo mi âstu bandonât, *n. 240.*

### **Cjants dal timp di Cuaresime**

- Parce Domine, *n. 125;*
- Signore guardaci nel tuo amore, *n. 126;*
- O muse insanganade, *n. 128;*
- O capo insanguinato, *n. 129;*
- O Signôr a schene plete, *n. 130;*
- Viers la cjase amade, o Pari, *n. 131;*
- Crist, Fi di Diu, ve dûl di nô, *n. 132;*
- Gno Diu, mê ruvîs là che mi pari, *n. 133;*
- Se il timp che Diu ti preste, *n. 134;*
- Come a l'aghe de fontane, *n. 135;*
- Quanta sete nel mio cuore, *n. 136;*
- Alla tua mensa, amato Salvatore, *n. 137.*

### **Salm dal Miserere, n. 50.**

- Misere mei Deus, *n. 231;*
- Ve dûl di me, *n. 252; n. 253.*

**Strade de crôs**, *n. 138;*

Via crucis, *p. 285.*

**Tal libri Hosanna**, si puedin cjatâ ancjemò altris cjants e salms adats al timp di Cuaresime.

\* \* \*

*La int dai ebreus e ven,  
ti fâs fietste cun ramis di palme;  
ve ch'o sin ca nô ancje,  
cun preieris, cjantis e laudis.*

De: Cjante di Domenie ulive - n. 146.

\* \* \*

\* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris*

*dal popul furlan, Ed. Glesie Furlane, 2012.*

\* *Il cjant dai salms resposoriâi, Ed. Glesie Furlane, 2012.*

\* *50 corâi de cristianitât todescje voltâts par furlan, ed. Glesie Furlane, 2016.*

\* *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La nuova base.*

\* *Par domandâ chescj libris scrivêt a [info@glesiefurlane.org](mailto:info@glesiefurlane.org)*